

Bergen, 11.09.20

Vår ref: 2020/916
Sakshandsamar: Eirin Kongestøl Espeland

Dykkar ref: 20/1128 - 20/36443

Alver kommune

Alver, Framo Flatøy AS – detaljregulering industriområde

Viser til brev av 19.06.20, med vedlegg, frå Alver kommune om ovannemnde sak.

Fiskarlaget Vest har sendt saka til Nordhordland Fiskarlag.

Generelle merknader

Fiskarane opplever ein stadig større konkurranse om areala, særlig i kystsona. Ein vil peike på at fiskarane i utgangspunktet er positivt innstilt til anna næring og aktivitet, men fiskeri og andre næringar har eit heilt ulikt forhold til bruk av sjøareal. Andre næringar har behov for nye/større sjøområde, medan fiskerinæringa er avhengig av å ta vare på viktige eksisterande fiske-, gyte- og oppvekstområde. Eksempel på konfliktområde er; oppdrett (areal og utslepp av spillfôr/feces/lusemidlar), vindmøller til sjøs, reguleringsplanar ut i sjø (friluftsområde i sjø, flytebyggjer, m.m.), ankring, avlaups-/vassleidningar, kablar, fritidsinteresser (båttrafikk, fritidsfiske).

I tillegg vil ein gjere merksam på at fiskarar kan til tider oppleve å motta klagar frå bebuarar og fritidsbebuarar. Det er viktig at ein respekterar fiskarane sin hevdvunne rett til bruk av sjøområde i si verksemd.

Mange meiner at eitt lite enkelt prosjekt ikkje kan skade, men mange nok slike så avgrensar ein tilgjengeleg areal for fiske bit for bit. Det er viktig at tilhøva blir lagt til rette slik at norske fiskarar fortsatt kan skape verdiar av fiske for spesielt kystsamfunna våre. «Sjøvern» er like viktig for fiskerinæringa, som «jordvern» for jordbruk.

Ein må òg vere merksam på at ikkje lyssetjing på land og i strandsona blir slik at det kan blende eller vere til ulempe for fiske/ferdsel på sjøen.

Framo Flatøy AS

Detaljreguleringsplanen legg til rette utviding av industriområde for verksemd på land og ny og større eksportkai. Med bakgrunn i dette er det tenkt utfylling i sjø.

Fiskarlaget Vest viser til Fiskeridirektoratet sitt kartverktøy som viser at det er registrert gytefelt og kaste- og låssettingsplassar ved reguleringsområdet. Det blir òg fiska i område som ikkje er registrert. Ein har t.d. «nye» fiskeri som leppefiske og fiske etter sjøkreps.

Det er positivt at det i føresegnene er fastsatt at det skal nyttast siltgardin ved utfylling i sjø. Sidan det er registrerte låssettingsplassar i nærleiken, må det òg sikrast at eigar av eventuell låssatt fisk, blir kontakta før ein iverksett tiltak som utfylling, mudring og sprenging i sjø

Ein vil til slutt gjere merksam på at fiskerinæringa er basert på fornybar biologisk produksjon, og er difor avhengig av eit reint og produktivt kyst- og havmiljø mest mogeleg fritt for miljøgifter, framandstoff og legemiddel. Ein har eit stort felles ansvar, både nasjonalt og internasjonalt, for å oppretthalde eit reint og produktivt hav. Det er avgjerande for kvalitet, omdøme og marknadsverdi for norsk sjømat. Det er viktig å førebyggje då det ofte er vanskeleg og dyrt å rydde opp i ettertid.

Ein visar elles til vår uttale av 06.06.19.

Med helsing
Fiskarlaget Vest

Britt Sæle Instebo
Dagleg leiar

Eirin Kongestøl Espeland
Rådgjevar

Kopi. Nordhordland Fiskarlag
Fiskeridirektoratet region Vest
Fylkesmannen i Vestland